

**2009 nr. 88 18. ágúst****Lög um Bankasýslu ríkisins**

**Tóku gildi 20. ágúst 2009.** *Breytt með:* L. 84/2011 (tóku gildi 30. júní 2011 nema 1. gr. og c-liður 14. gr. sem tóku gildi 1. sept. 2012). L. 126/2011 (tóku gildi 30. sept. 2011). L. 130/2016 (tóku gildi 1. júlí 2017). L. 7/2019 (tóku gildi 22. febr. 2019). L. 80/2024 (tóku gildi 10. júlí 2024; falla úr gildi skv. fyrirmælum í 6. gr.).

Ef í lögum þessum er getið um ráðherra eða ráðuneyti án þess að málefnasvið sé tilgreint sérstaklega eða til þess vísað, er átt við **fjármála- og efnahagsráðherra** eða **fjármála- og efnahagsráðuneyti** sem fer með lög þessi.

**■ 1. gr. Markmið og gildissvið.**

□ Bankasýsla ríkisins er sérstök ríkisstofnun sem heyrir undir [ráðherra].<sup>1)</sup>

□ Bankasýsla ríkisins fer með eignarhluti ríkisins í fjármálafyrirtækjum, í samræmi við lög, góða stjórnsýslu- og viðskiptahætti og eigendastefnu ríkisins á hverjum tíma, og leggur þeim til fé fyrir hönd ríkisins á grundvelli heimildar í fjárlögum.

□ Bankasýsla ríkisins skal í starfsemi sinni leggja áherslu á endurreisn og uppbyggingu öflugs innlends fjármálamarkaðar og stuðla að virkri og eðlilegri samkeppni á þeim markaði, tryggja gagnsæi í allri ákvarðanatöku varðandi þátttöku ríkisins í fjármálastarfsemi og tryggja virka upplýsingamiðlun til almennings.

□ Bankasýslu ríkisins er heimilt að setja á fót og fara með eignarhluti ríkisins í félögum sem samræmast hlutverki og markmiðum hennar.

<sup>1)</sup> L. 126/2011, 515. gr.

**■ 2. gr. Stjórn.**

□ Með yfirstjórn Bankasýslu ríkisins fer þriggja manna stjórn sem [ráðherra]<sup>1)</sup> skipar. Einn varamaður skal skipaður með sama hætti. Stjórnarmenn skulu uppfylla hæfisskilyrði 6. gr. [Ráðherra]<sup>1)</sup> skipar formann og varaformann og ákveður þóknun stjórnarmanna.

□ Hlutverk stjórnar er að móta áherslur í starfi og fylgjast með starfsemi og rekstri stofnunarinnar. Allar meiri háttar ákvarðanir skal bera skriflega undir stjórnina til samþykktar eða synjunar.

□ Ákveði [ráðherra]<sup>1)</sup> í undantekningartilvikum að beina tilmælum til stjórnar stofnunarinnar um tiltekin mál getur stjórnin tjáð ráðherra afstöðu sína til þeirra áður en við þeim er orðið. [Efnahags- og viðskiptaneftnd]<sup>2)</sup> Alþingis skal gerð grein fyrir tilmælum ráðherra og afstöðu stjórnarinnar til þeirra eins fljótt og auðið er.

<sup>1)</sup> L. 126/2011, 515. gr. <sup>2)</sup> L. 84/2011, 42. gr.

**■ 3. gr. Forstjóri.**

□ Forstjóri Bankasýslu ríkisins er ráðinn af stjórn stofnunarinnar. Forstjóri skal uppfylla hæfisskilyrði 6. gr. [Um laun og önnur launakjör forstjóra fer skv. 39. gr. a laga nr. 70/1996, um réttindi og skyldur starfsmanna ríkisins, og stjórn stofnunarinnar semur starfslýsingu hans.]<sup>1)</sup>

□ Forstjóri mótar helstu áherslur, verkefni og starfshætti stofnunarinnar og annast daglega stjórn hennar ásamt því að ráða starfslíð. Hann ber ábyrgð gagnvart stjórninni á starfsemi og rekstri stofnunarinnar.

<sup>1)</sup> L. 130/2016, 8. gr.

**■ 4. gr. Verkefni.**

□ Verkefni Bankasýslu ríkisins eru:

a. Að fara með eignarhluti ríkisins í fyrirtækjum og félögum, sbr. 1. gr.

b. Að sjá um samskipti ríkisins við fjármálafyrirtæki sem ríkið á eignarhluti í og tengjast eigendahlutverki þess. Sam-

skiptin fara fram í gegnum bankaráð og stjórnir fjármálafyrirtækjanna.

c. Að hafa eftirlit með framkvæmd eigendastefnu ríkisins eins og hún er á hverjum tíma.

d. Að fara með atkvæði ríkissjóðs á hluthafafundum fjármálafyrirtækja og á fundum stofnfjáreigenda sparisjóða.

e. Að gera samninga við stjórnir hlutaðeigandi fjármálafyrirtækja, þar á meðal um eiginfjárframlög og um sérstök og almenn markmið í rekstri þeirra. Bankasýsla ríkisins setur þau skilyrði sem hún telur nauðsynleg vegna eiginfjárframlaga. Útdrættir úr samningum skulu birtir opinberlega 12 mánuðum eftir að þeir hafa verið gerðir.

f. Að fylgjast með að settum markmiðum í samningum verði náð.

g. Að gera tillögur til [ráðherra]<sup>1)</sup> um frekari fjármögnun fjármálafyrirtækja á grundvelli hlutverks og markmiða stofnunarinnar.

h. Að meta og setja skilyrði um endurskipulagningu og sameiningu fjármálafyrirtækja með hliðsjón af hlutverki og markmiðum stofnunarinnar og eigendastefnu ríkisins.

i. ...<sup>2)</sup>

j. ...<sup>2)</sup>

<sup>1)</sup> L. 126/2011, 515. gr. <sup>2)</sup> L. 8/2024, 6. gr.

**■ 5. gr. Samkeppnissjóðarmið.**

□ Stofnunin skal í starfsemi sinni og við meðferð eignarhluta ríkisins kappkosta að efla og styrkja samkeppni á fjármálamarkaði, m.a. með því að stuðla að því að öflug og virk samkeppni ríki milli fjármálafyrirtækja í eigu ríkisins.

□ Við starfsemi stofnunarinnar skal þess vandlega gætt að trúnaðarupplýsingar um rekstur og starfsemi einstakra fjármálafyrirtækja sem hún fær vitneskju um berist ekki til annarra fjármálafyrirtækja.

**■ 6. gr. Hæfisskilyrði.**

□ Stjórnarmenn og forstjóri skulu hafa haldgóða menntun auk sérþekkingar á banka- og fjármálum. Gæta skal þess við skipun stjórnar að starfsreynsla og menntun stjórnarmanna sé sem fjölbreyttust á þessu sviði og þeir hafi trausta þekkingu á góðum stjórnarháttum fyrirtækja.

□ Stjórnarmenn og forstjóri skulu vera lögráða. Þeir mega ekki á síðustu fimm árum hafa verið úrskurðaðir gjaldþrota eða hlotið dóm í tengslum við atvinnurekstur samkvæmt almennum hegningarlögum, samkeppnislögum, lögum um fjármálafyrirtæki, lögum um hlutafélög, lögum um einka- hlutafélög, lögum um bókhald, lögum um ársreikninga, lögum um gjaldþrotaskipti o.fl. eða þeim sérlægum sem gilda um aðila sem lúta opinberu eftirliti með fjármálastarfsemi.

□ Stjórnarmenn og forstjóri skulu hvorki taka þátt í meðferð mála þar sem þeir eiga verulegra hagsmuna að gæta né mála sem varða aðila sem eru tengdir þeim persónulega eða fjárhagslega.

**■ 7. gr. Valnefnd.**

□ Stjórn Bankasýslu ríkisins skipar sérstaka þriggja manna valnefnd sem tilnefnir aðila fyrir hönd ríkisins sem rétt hafa til setu fyrir hönd ríkisins í bankaráðum eða stjórnum fyrirtækja á forræði stofnunarinnar. Valnefndin skal tryggja að í bankaráðum og stjórnum fyrirtækja sitji sem næst jafnmargar konur og karlar. Bankasýsla ríkisins óskar formlega eftir tilnefningum valnefndar um stjórnarmenn fyrir stjórnarkjör í hlutaðeigandi bankaráðum eða stjórnnum.

□ Stjórn Bankasýslu ríkisins skal setja nefndinni starfsreglur þar sem fram koma þau viðmið sem valnefndin styðst við í mati sínu á hæfni, menntun og reynslu einstaklinga sem til

greina koma til setu í bankaráðum eða stjórnnum fyrirtækja. Starfsreglurnar skulu birtar opinberlega á vefsvæði Bankasýslu ríkisins.

□ Nefndin kemur saman svo oft sem þurfa þykir og ákveður [ráðherra]<sup>1)</sup> þóknun nefndarmanna.

□ Unnt er að bjóða sig fram til setu í bankaráðum og stjórnnum fyrirtækja með því að senda nefndinni ferilskrá sína.

<sup>1)</sup> L. 126/2011, 515. gr.

■ **8. gr. Skýrslugjöf.**

□ Bankasýsla ríkisins skal gefa [ráðherra]<sup>1)</sup> ítarlega skýrslu um starfsemi sína fyrir 1. júní ár hvert. Í framhaldi af því gerir [ráðherra]<sup>1)</sup> Alþingi grein fyrir starfsemi stofnunarinnar og hvernig til hefur tekist varðandi meðferð eignarhluta ríkisins og hverjar framtíðaráherslur ríkisins eru varðandi þá.

<sup>1)</sup> L. 126/2011, 515. gr.

■ **9. gr. ...**<sup>1)</sup>

<sup>1)</sup> L. 7/2019, 1. gr.

■ **10. gr. Gildistaka.**

□ Lög þessi öðlast þegar gildi.

**Ákvæði til bráðabirgða.**

■ **I.**

□ Þrátt fyrir ákvæði 2. mgr. 1. gr. er [ráðherra]<sup>1)</sup> heimilt að leggja bönkum og sparisjóðum til eigið fé er uppfylli lág-

markskröfur um eiginfjárlutfall án milligöngu Bankasýslu ríkisins enda hafi hún ekki tekið að fullu til starfa. Sé slík heimild nýtt skal [ráðherra]<sup>1)</sup> binda eiginfjárframlagið við-eigandi skilyrðum, sbr. e-lið 4. gr. Réttur Bankasýslu ríkisins til þess að setja frekari skilyrði, breyta skilmálum samninga og réttur til upplýsinga til að fylgjast með árangri fjármála-stofnana skal vera hluti af slíkum skilyrðum. Frekari eigin-fjárframlög og endanleg fjármögnun verður á hendi Banka-sýslunnar.

<sup>1)</sup> L. 126/2011, 515. gr.

■ **II.**

□ Þrátt fyrir ákvæði 8. gr. skal Bankasýsla ríkisins gefa [ráðherra]<sup>1)</sup> ítarlega skýrslu um starfsemi sína í fyrsta sinn fyrir 1. nóvember 2009. Í framhaldi af því gerir [ráðherra]<sup>1)</sup> Alþingi grein fyrir starfsemi stofnunarinnar og hvernig til hefur tekist varðandi meðferð eignarhluta ríkisins og hverjar framtíðaráherslur ríkisins eru varðandi þá.

<sup>1)</sup> L. 126/2011, 515. gr.

■ **[III.]**

□ Stofnunina skal leggja niður þegar verkefnum hennar er lokið.<sup>1)</sup>

<sup>1)</sup> L. 7/2019, 2. gr.